

2001 urteari buruzko proiektua aurkeztu du BAM distrituak

Garapen Ekonomikorako Agentzia bat sortzea proposatu dute

Baiona, Angelu eta Miarritzek osatutako distrituak 25 urte bete ditu aurten. Egiturak astindu bat behar zuela ikusirik, Alain Lamassoure buruak zuzendutako taldeak estatusen aldaketari ekin dio, eta 2001 urteari buruzko proiektuaren lerro nagusiak aurkeztu ditu. Distritu inguruko herriei lan horretan parte hartzeko deia egin die.

Hur Gorostiaga / Baiona



Alain Lamassoure Barrutiko buruak Baiona eta Miarritzeko zinegotziak alboan zituela azaldu zuen proiektua.

BOB EDME

DISTRITUA Baiona, Angelu eta Miarritzeko udalek elkarrekin ezarritako zerbitzuetarako eskumenek osatzen dute. Baina distrituaren inguruan, aglomerazio oso bat biltzen da inguruan dauden beste herri andanarekilaran. Azken urteotan hainbat herri izan dira distrituaren inguruan puztu direnak. Distrituak hogeita bost urte bete ditu aurten; 1972. urtean, sortu zenean, 100.000 pertsona inguru biltzen zituen bere inguruan, eta gaur egun, berriz, orotara 160.000 pertsona dira.

Gisa horretan, aglomeraziorako proiektua aurkeztu zuen atzo Alain Lamassoure distrituko buruak 2001 urteari buruz egin, alboan Jean Claude Bustingorri eta Michel Veunac Baiona eta Miarritzeko zinegotziak zituela.

«Jende kopuruaren emendatze horrekin batera, hainbat zerbitzu garatu dira eremuan, askotan koherentziarik gabe. Gisa horretan, gaur egun hiru hirien zentroak desorekatzen ari dira; lehen auzo soilak ziren batzuk garrantzi handia hartzen ari dira, jende kopuruari dagokionez. Gisa berean, ingurugiroaren zainketari buruzko kezka dugu», esan zuen Lamassourek. Helbu-

ru horretan ingurugiroa, formakuntza, garraioak eta enpresen dako informazio bilaketa proposatzen duen txostena aurkeztu du. «Etorkizuneko eremua eta garraio zein konpetentziak definitzean ez dugu agintari izan nahi, akulatzaile baizik», azaldu zuten.

Distritua orain arte oso egitura itxia izan da. Hiru hirietako auzapezen taldeko kontseilariak bertzerik ez dira bertan, eta azken finean demokrazia eskasia salatu du askotan oposizioak. Gaur egun proposatzen duen 2001 urteari begirako proiektua «ahalik eta jende gehienek» eztabaidatzea nahi du Lamassourek, baina, hala ere, distriturako sarre-rarik ez du eskaini. Eskumenei dagokionez, berriz, egun udalek emandakoak aski direla azaldu zuten.

Etorkizuneko xede horretan Landesetako hegoaldea ere kontuan hartzen du ministro ohiak. «Aglomerazioaren garapenean herri guztiek hartu behar dute parte. Horregatik auzapez guztien ikusten izan naiz, Aturriren bi aldetan. Gisa berean, Landese-

tako eta Pirinio Atlantikoetako ordezkariekin egon naiz», azaldu zuen lehendakariak. Hari berari jarraiki, Ipar Euskal Herriko barnealdearen garapenari so egin beharra ere azpimarratu du Alain Lamassoure distrituko buruak.

Ildo horretatik, ekonomi eskumen murrizak baditu ere, Ekonomi Garapenerako Agentzia baten sorrera aipatu zuen atzo, 2001. urteari so. Horretarako Merkataritza Ganbararekin eta Garapen Kontseiluarekin batera lan egin beharra azpimarratu zuen.

Goi mailako irakaskuntzari dagokionez, berriz, Baiona, Miarritz eta Angeluko (BAM) distrituak IUT eta fakultate osoak behar dituela dio prestatutako txostenak, baina Pauetik askatzea aipatu gabe.

«Kalitatea behar dugu lehen-lehenik, eta ondotik formakuntza berriak ireki», gehitu zuen Ipar Euskal Herriko Unibertsitateaz mintzatu gabe. Pauko Unibertsitatearekin harremanak sendotzea proposatu du distrituko taldeak. X

Iparraldeko talde antierrepresiboak elkarrekin batasunean ariko dira lanean

Euskal presoak Euskal Herriratzea galdegiteko kanpaina abiatuko dute

Hur Gorostiaga / Makea

IPAR EUSKAL HERRIKO talde antierrepresiboetako 140 pertsona bildu ziren atzo arratsaldean. Makeako ezker-paretan. Talde antierrepresiboek batasunean lan egitea hitzartu zuten atzoko biltzar nagusian. Horixe izan zen bitzarreko gai nagusia. Elkarlaren lehen fruitu bezala, lehenbailehen Frantziako presondegi-tan barreiatuak diren 72 euskal preso politikoak Euskal Herriratzeako kanpaina abiatzea erabaki zuten. Gisa horretan herrialdeetako sustengu komite-

ek eskakizun hori beren eskualdean eta elkarrekin lurralde osoan zabaltzeko elkarlana bultzatuko dute aurrerantzean.

Koordinaketarekin urteetako zatiketa eta gaizkiulertuak atzean uzteko xedea agertu zuten Makean bildutakoek. Hemendik aitzina hilabetero bilduko den Ipar Euskal Herriko taldeen ordezkariak osatuko dute koordinaketa, eta astero bilduko den idazkaritzak ere bai. Gisa berean, koordinaketaren gain egonen da Iparraldeko hogeitasei hilabeteroko diruaren bidaltzea. Orain arte sustengu komite

bakoitza bere presoez ardura-tzen zen.

Biltzar nagusia prestatzen ari-tu diren taldeetako ordezkariak oso baikortzat jo zuten biltzar nagusia. Jean François Lefort Lof-ek, esate baterako, «hainbertze jende agertzeak batasunera-ko dagoen borondatea agerian» uzten duela adierazi zuen, biltzarretik landa. Gisa berean, presoek Ipar Euskal Herriko hainbat eskualdeetan duten sustengua Makean sentitzeko parada izan zela azaldu zuen Gurekin Uztaritzeko presoen sustengu komiteko kideak. X

Iñigo Guridiren aldeko herri ekimena sortu dute

Billabonako gaztea errugabea dela frogatzeko

Ramon Olasagasti / Billabona

IÑIGO GURIDI, Ibarako festetan ertzain batek balaz zauritu eta, ondoren, ertzain horri erasotzeaz akusatuta atxilotu zuten Billabonako gaztearen aldeko herri ekimena aurkeztu zuten atzo Billabonan. Lau helburu nagusi izango ditu plataformak. Lehenik, «Espainiako Barne Ministerioak eta Herri-zaingo Sailak, komunikabiden laguntzaz, bala justifikatzeko eman duten sasi-bertsio hori agerian uztea». Bigarrenik, Iñigo eta senitartekoei sustengu moral eta ekonomikoa ematea. Hirugarrenik, bere askatasuna aldarrikatu eta horren alde lan egitea.

Azken helburua, berriz, zenbait ekimen aurrera eramatea izango da. Oraingo 4.500 sinadura bildu dituzte eta bonolaguntzak eta kontu korrante bat ere zabaltu dituzte. Bestetik, egun bakar batean hainbat ekitaldi antolatzeko asmoa dute: mendi mar-txa, bazkaria, bertsio ofizialaren parodia, kontzertua eta manifestazioa.

Plataformaren aurkezpenean 50 bat lagun bildu ziren. Mahaian, koadriletako kideak, HBko, Senideak elkarteko,

AEK-ko eta LABeko ordezkariak, Herri Ekimeneko koordinatzaileak eta Guridiren irakasle izandako bat eseri ziren, ekimenaren ordezkari gisa. Ekimenak «bala justifikatzeko komunikabide batzuen laguntzarekin» zabaltu den bertsio ofiziala salatu zuen. «Bertsio horren erruz, Iñigo aurrez epaitu dute», gaineratu zuten.

Ekimenak, halaber, eskutitz bidez Guridirekin eginiko elkarriketaren berri eman zuen. Elkarriketa horretan, Guridik azaltzen du abuztuaren 24ko gauean gertatu zen guztia. Guridik dioenez Ainara tabernara joan zirenerako istiluak oso baretuta zeuden. «Tragoa-ekin kanpora atera eta herriko lagun batekin geratu nintzen hizketan. Une horretan bi tiro entzun genituen, eta bi tipo lurrera erori ziren. Zer gertatzen zen gerturatzeko ikusi eta hirugarren tiroarekin sentsazio arraro bat sentitu nuen izterrean».

Ondorengoak jakinak dira. Era berean, erietxean alta eman baino lehen espetxeratu zutela gaitzetsi zuten. Herri ekimeneko partaideen ustetan, «Iñigok kartzelan dirauen minutu bakoitzeko injustizia handi bat egiten ari dira». X



BERMEOKO UDALA

ERROLDAREN ONARPENARI BURUZKO IRAGARKIA

1997ko urriaren 16an eguneko Dekretuen bidez, Bermeoko Udaleko Alkate-udalburuak onartu dau:

LEHENENGOA:

1997ko irailako ekitaldiari jagokan 23. zenbakidun karguaz, MUSIKA ESKOLARI buruzko errolda onartzea, 983.423.-pezetaz Kobrantzako borondatezko Epealdia honako hau da:

Hasiera: 1997ko urriak 22.
Amaiera: 1997ko abenduak 22.

BIGARRENA:

Kobrantza epealdia hasi baino hamabost egun lehenago hasiko da erroldak jendaurrean jartzeko hilabeteko epealdia. Udaletxean egongo da errolda horiek aztergai esandako epe horren barruan.

Erroldaren onarpena eta horren ondorioz egingo diran kitapenen aurka, Birjarpeneko Errekurtsoa jarri daiteke alkate-udalburuaren aurrean, errolda honek jendaurrean jartzeko epea amaitzen dan egunetik hasitako hilabetearen barruan.

KARGU ZENBAKIA: 23
ERREZIBO KOPURUA GUZTIRA: 174
KONTZEPTUA: MUSIKA ESKOLA
EKITALDIA: 1997ko IRAILA
DIRUKOPURUA: 983.423
LEHENENGO ZERGADUNAREN IZENA: ABAD ORMAZA, MAITE
AZKEN ZERGADUNAREN IZENA: ZULUETA VALTIERRA, AMAIA.

ALTETZAREN DEKRETOA

Gaurko egunean, Udal Musika Eskolako 1997ko iraileko (97/98 ikasturtea) Salneurri Publikoaren Errolda onartzera nator, diru zenbateko honek izanik:

MAILA	KOP.	DIRU-KOP.
HARRERA A-B	23	54.970
HARRERA D	14	39.900
HASIERA M.	105	697.953
MEOK	12	56.280
GOTORTZE MAILA	20	134.320
GUZTIZ	174	983.423

Bermeon, 1997ko urriak 16.
ALKATEA.